

Ina dumengia divertenta

La dumengia ils 02 d'october, in di da bial'aura atunila, ein giuvenils dalla Cadi levai baul per saver semetter sin viadi el Tessin, numnadamein a Magadino per ir cun Go-Kart. Il transport ha il Daniel Schmid da Sedrun fatg, el ei president dalla cumissiun dalla lavur da GIUVENTETGNA CADI. 16 giuvenils han giu plaz el bus dil Daniel e 4 egl auto da Gabi.

Ils biars giuvenils eran ualti malruasseivels perquei ch'els selegravan sin quell'aventura. Il viadi a cuzzau circa 2 uras amiez e cun buna luna ed ad uras essan nus arrivai el liug giavischau.

Cura che nus essan stai arrivai al termin fatg giu cun la firma Longhi havein nus stuiu spitgar empau perquei ch'ei marschava bia sin pista. Autras gruppas d'affons, giuvenils, mo era da carschi frequentavan las rundas sil parcour. Nus eran extra buc ir a gentar per esser ad uras ed ussa fussen nus schon bugen semess els Karts ed havessan sez dau gas. Mo ei ha giu num haver pazienza e tuttenina s'ei iu spert. Senza grondas discussiuns havein nus fatg duas gruppas e tedlau cun atenziun las instrucziuns. En l'emprema gruppa eran quels ch'ei schon stai pliras gadas cun quels vehichels ed ella secunda ils entschaviders. Gabi haveva reservau per nus il « Pacchetto Oro », cun quella purschida san ins percuorrer treis rundas da mintgamai diesch minutas cun mesira da temps e rangaziun. Ir cun Go-Kart ina mesura el cauld sulegl dil Tessin ei ualti stregn, era sch'ins tratga buca quei sin l'emprem'egliada. Nus havein gudiu fetg da carrar sez, mo era da mirar co nos collegas dalla gruppa 1 ein sestalegiai sil parcour. Mintgaton fageva in pilot ina rudiala sin pista ni carrava o sil prau, mo malsegiras situaziuns hai dau neginas. Cun grond applaus ein ils victurs vegni festiva: **1. plaz, Rafael Manetsch da Mustér cul temps 39.930, 2. plaz, Nevio Monn da Camischolas cul temps 40.258 ed il 3. plaz Paco Monn da Camischolas cul temps 40.276.** Bravo e cordiala gratulaziun.

La fom ei s'annunziada el venter e nus essan semess el bus per carrar el McDonalds. Leu havein nus magliu cun gust e tschintschau ina massa in cun l'auter, dall'aventura da Go-Kart e dad autras caussas interessantas.

Cuntents e staunchels essan arrivai la sera anavos a casa. Propi in di plein divertiment, engraziel a GIUVENTETGNA CADI ed a nies chauffeur da bus Daniel.

Laura Duff e Nevio Monn



